

LA USC DI LADINS – VENERDÌ 12 OTTOBRE 2012

Edith Ploner presidenta

L Cunsèi scolastich provinziel à lità si presidènta nueva per i proscimi cater ani. La ncèria da president vèn curida a rotazion danter la grupes de rujeneda y ntan l ultimo ann menerà Edith Ploner chësc majer organn cunsultif dla scoles tla Provincia de Bulsan



L intendènt Roland Verra y l assessèur Florian Mussner ie stai i prins a ti fé i auguresc a Edith Ploner, presidènta ladina dl Cunsèi scolastich provinziel.

Scola - L ie nce nce unì lità Christoph Hartung von Hartungen per la grupa tudëscia y Carlo Runcio per la grupa taliana.

L Cunsèi scolastich provinziel a cun si 63 cumèmbri na funzion consultiva per la gran dezijions che reverda la scoles. For inò iel de bujèn de se adaté ai tèmps y nsci vèn chësc cunsèi cherdà a de ju na minonga da espert n con'de programs de scola, materies o nce sce la se trata de mèter su y tò ju scoles.

Tl plenum vèniel tratà i gran argumènc che reverda duta trèi la grupes de rujeneda. Ntan i prim trèi ani sarà n iede Christoph Hartung von Hartungen president y pona Carlo Runcio. Ntan l cuarto ann sarà l'ispetëura dla scolines ladines Edith Ploner presidènta dl Cunsèi scolastich provinziel. "Te chësc majer organn lità sarà de bujèn de na vijion deberieda

per purté inuvazion tla scola, se adatan ala cundizions che l tèmp nes mèt dant," à dit la presidènta ladina riesc do si vela. L sistem de president a rotazion danter la trèi grupes de rujeneda vèija dant che i autri doi cuer daniëura la ncèria da vizepresident. L tèmp de presidènta ie mparti te 18 mënc per la grupa tudëscia, 18 mënc per la grupa talian y 12 mënc per la grupa ladina.

La Scola ladina à de ndut 8 cumèmbri te chësc cunsèi (cun 12,7% de 63 cumèmbri iel na reprentanza sèura l proporz). L assessèur ladin Florian Mussner y l intendènt Roland Verra ie cumèmbri de dèrt. A reprenté i diretëures y ispetëures fova bele de mei unida liteda Edith Ploner. I trèi reprentanc di nseniand ladins fova unic litei Walter Pescosta (scoles autes), Michaela

Vittur (scoles elementeres) y Uberto Valentini (scoles mesanes). I genitores dla scoles ladines ie reprentei da Ivana Peristi y i sculeies da Romeo Costa.

Per cuestions che reverda me una na grupa de rujeneda vèniel nce laurà te sezions. Edith Ploner menerà la sezion ladina per dut l tèmp nchin ala fin dl ann de scola 2015/16. Tla sezion ladina dl Cunsèi scolastich iel mo 8 reprentanc sèurapò, che ne fej nia pert dl plenum. Tlo fòvel d'ansiada unì lità Bruno Senoner (diretëur), Rosmarie Senoner (scolines), Verena Niederegger (nseniand de religion), Andreas Tomasini (scola profesciunela), Heinrich Videsott (Chemuns), Evelin Moroder (economia y mond dl lèur), Paul Videsott (Università) y Andrea Tardivo (cèsa per i studènc). (Ufize stampa provinziel de Südtirol)



L Cunsèi scolastich provinziel, l majer organn lità per cuestions de scola, à lità si presidènc nuevas.